

Evening Dogri (NSD)

30-01-2026

खबरां

1. केंद्री गृह मंत्री अमित शाह होरें असम च 1 ज्हार 700 करोड़ रपे शा मते दी केई विकास परियोजनाएं दा उद्घाटन ते नीहू पत्थर रखेआ।
2. 5 प्राथमिकता आहले क्षेत्रें च सांझेदारी गी मजबूत करने लेई कल नमीं दिल्ली च भारत अरब विदेश मंत्रियों दी दुई बैठक होग।
3. विदेश मंत्री डॉ. एस जयशंकर होरें नमीं दिल्ली च फिलीस्तीन दे विदेश मामलें दे मंत्री वर्सेन अधाबेकियन शाहीन हुंदे नै मुलाकीत कीती।
4. संयुक्त राष्ट्र प्रमुख होरें भारत यूरोपीय संघ मुक्त बपार समझौते दी सराहना कीती, स्थिर विश्व लेई बहुध्रुवियता दा समर्थन करने दी जरूरत पर बल दित्ता।
5. सुरक्षाबलें जैश-ए-मोहम्मद दे आतंकवादिएं दा पता लाने लेई जम्मू ते कश्मीर दे किश्तवाड़ जिले च आतंकवाद बरोधी अभियान तेज करी दित्ता ऐ।
6. महात्मा गांधी हुंदी 78मीं पुण्यतीथि पर राष्ट्र उनेंगी चेत्ता कर'रदा ऐ।

<><><><><><>

HM-Projects

गृह मंत्री अमित शाह होरें अज्ज असम दे डिब्रूगढ च विधानसभा दे दुए परिसर सने 1 ज्हार 715 करोड़ रपें दिएं परियोजनाएं दा शुभारंभ कीता। डिब्रूगढ च इक जनसभा गी संबोधित करदे होई श्री शाह होरें आखेआ जे भारत-यूरोपी संघ मुक्त बपार समझौता यूरोपी मुल्खें च असम दी चाह दे निर्यात गी बढ़ावा देग। उ'नें आखेआ जे केंद्र सरकार ने असम गी हाड़ें शा मुक्त बनाने लेई केई गैहीं पुट्टियां न। उ'नें मतदाताएं गी औंदे विधानसभा चुनाएं च विकास, शांति, सुरक्षा, उद्योग ते हाड़ें शा मुक्त असम लेई भारती जनता पार्टी गी वोट देने दी गुजारिश कीती। पैहलकी कांग्रेस सरकार पर असम दी अनदिक्खी करने दा आरोप लांदे होई श्री शाह होरें आखेआ जे कांग्रेस ने अपने वोट बैंक दी राजनीति लेई घुसपैठ गी थेहूार बनाया। उ'नें आखेआ जे प्रधानमंत्री नरेंद्र मोदी हुं'दे नेतृत्व च सरकार राज्य दे विकास लेई बुनियादी ढांचा परियोजनां आहन्ना करदी ऐ। उ'नें आखेआ जे पैहले असम हिंसा ते अशांति

लेई जानेआ जंदा हा, पर बीजेपी दी सरकार च राज्य हुन शांति ते विकास लेई जानेआ जंदा ऐ। श्री शाह होरें आखेआ जे एहू राज्य दे लोकें, खासकरियै उप्परले असम लेई इक ऐतिहासिक दिन ऐ कीजे डिब्रूगढ च असम विधानसभा दा दुआ परिसर बना करदा ऐ। गृह मंत्री होरें असम दे मुखमंत्री हिमंता बिस्वा सरमा, केंद्री मंत्री सरबानंद सोनोवाल ते होरें गणमान्य व्यक्तियें दी मजूदगी च इ'नें परियोजनाएं दा शुभारंभ कीता। श्री शाह होरें डिब्रूगढ गी दुए प्रशासनिक केंद्र दे रूपै च स्थापत करने दे सरकारी जतनें तैह्त 284 करोड़ रुपें दी लागत कन्नै बना करदे विधानसभा दे दुए परिसर ते विधायकें दे होटल लेई नीहू पत्थर रक्खेआ। इस परियोजना च 3 मंजिला विधानसभा भवन, विधायकें लेई 9 मंजिला होस्टल, 8 सौ सीटें आह्ला सभागार ते सुरक्षाकर्मियें लेई बैरक शामिल होडन। श्री शाह होरें 238 करोड़ रुपें दी लागत कन्नै बना करदे आधुनिक खेडू परिसर दे पैह्ले चरण दा बी उद्घाटन कीता ते एह्दे दुए चरण दा नीहू पत्थर रक्खेआ, जेह्दा निर्माण तकरीबन 209 करोड़ रुपें दी लागत कन्नै कीता जाह्ग। गृह मंत्री होरें जंगली जीएं-जैतुएं दे इलाज ते उन्नत लैबाटरी सुविधाएं दे कन्नो-कन्नो सिखलाई सरबंधी इकाइयें लेई 292 करोड़ रुपें दे इक केन्द्र दा बी नीहू पत्थर रक्खेआ। उ'नें राश्ट्री आपदा कोष दे तैह्त 692 करोड़ रुपें दी इक परियोजना दा बी शुभारंभ कीता।

<><><><><><>

2nd India Arab FM Meet

भारत ते अरब देशें दे विदेश मंत्रियें दी दुई बैठक कल नमी दिल्ली च होग। एह्दी सह अध्यक्षता भारत ते संयुक्त अरब अमीरात करा'रदा ऐ। अरब देशें दे विदेश मंत्री ते अरब लीग दे महासचिव इस बैठक च शामिल होडन। एहू भारत ते अरब दे विदेश मंत्रियें दी पैहली बैठक ऐ जिसदी मेजबानी भारत करा'रदा ऐ। नमी दिल्ली च भारत ते अरब दे वरिष्ठ अधिकारिएं दी चौथी वार्ता बी होआ'रदी ऐ। तोआई, विदेश मंत्री डॉ. एस जयशंकर होरें अज्ज नमी दिल्ली च अरब लीग दे महासचिव अहमद अबुल धीत कन्नै मुलाकात कीती। डॉ. जयशंकर होरें सोशल मीडिया पोस्ट च आखेआ जे उनें बक्ख-बक्ख क्षेत्रें च सहयोग ते सुदृढिकरण दे बारे च व्यापक चर्चा कीती। मंत्री होरें दस्सेआ जे उनें क्षेत्र च हाल दे घटनाक्रमें पर बी विचार-विमर्श कीता।

<><><><><><>

Jaishankar Palestine Minister

विदेश मंत्री डॉ. एस. जयशंकर होरें नमीं दिल्ली च फिलीस्तीन दे विदेश मंत्री वर्सेन अधाबेकियन शाहीन कन्नै मुलाकात कीती। इक सोशल मीडिया पोस्ट च डॉ. एस जयशंकर होरें आखेआ जे इस बैठक दरान दौनें नेताएं भारत ते फिलीस्तीन बश्कार विकास ते सहयोग दी समीक्षा कीती। दौनें नेताएं इत्त सरबंघ गी अग्गे लेई जाने दी पैहलें पर सहमत होए। श्री जयशंकर होरें आखेआ जे दौनें पक्षें गाजा शांति योजना ते क्षेत्रीय घटनाक्रमें पर अपने विचारें दा आदान-प्रदान बी कीता।

<><><><><><>

UAE-Russia Talks

संयुक्त अरब अमीरात दे राष्ट्रपति शेख मोहम्मद बिन जायद अल नाहयान होरें मास्को च रूसी राष्ट्रपति व्लादिमीर पुतिन कन्नै वार्ता कीती। एह वार्ता संघर्ष गी समाप्त करने लेई अमरीका रूस यूक्रेन दे लगातार राजनयिक प्रयासें बश्कार होई। एह बैठक अबू धाबी आसेआ रूस, यूक्रेन ते संयुक्त राज्य अमरीका बश्कार त्रिपक्षीय वार्ता पैहले दौर दी मेजबानी दे बाद होई जेडा वैश्विक संघर्षे च इक विश्वसनीय मध्यस्ि रूपै च संयुक्त अरब अमीरात दी बददी भूमिका गी रेखांकित करदी ऐ।

<><><><><><>

FTA-UN

हाल च गै भारत ते यूरोपीय संघ बश्कार होए दे मुक्त बपार समझौते दा हवाला दिंदे होई संयुक्त राष्ट्र प्रमुख एंटोनियो गुतरेस होरें बहु ध्रुवियता दा समर्थन करने दी जरूरत पर बल दित्ता ते आखेआ जे वैश्विक समस्याएं दा समाधान कुसै इक शक्ति आसेआ नेई कीता जाई सकदा। संयुक्त राष्ट्र प्रमुख होरें इक स्थिर विश्व लेई बहु ध्रुवियता दे समर्थन दी जरूरत पर बल दित्ता जिस च शांति कायम रेई सकै।

<><><><><><>

Chattisgarh Moaists

छत्तीसगढ़ दे सुकमा जिले च अज्ज 4 माओवादिएं आत्मस्मर्पण करी दित्ता। आत्मस्मर्पण करने आहले माओवादिएं च 2 महिला कार्यकर्ता बी शामिल ना। इन्दे पर कुल 8 लख रपे दा ईनाम घोशित कीता गेदा हा। सुकमा जिले मुख्यालय च आयोजित इक कार्यक्रम च माओवादियें अपने थेआर त्यागी दित्ते। इस कार्यक्रम च बस्तर रेंज दे पुलस महानिरीक्षक सुंदरराज पी सुकमा दे पुलस अधीक्षक किरण चौहान ते होरनें वरिष्ठ सुरक्षाबल अधिकारी उत्थे मजूद हे।

PM-Article

प्रधानमंत्री नरेंद्र मोदी होंरें आखेआ जे भारत यूरोपीय संघ मुक्त बपार समझौता भारत गी इक विकसित देश बनाने दे दृष्टिकोण कन्नै पूरी चाल्ली कन्नै मिलदा ऐ। वाणिज्य ते उद्योग मंत्री पीयूष गोयल होंरें उंदे आसेआ लिखित इक लेख गी सोशल मीडिया पोस्ट च सांझा करदे होई प्रधानमंत्री होंरें आखेआ जे सरकार नै इक परिवर्तनकारी समझौता कीता ऐ जेड़ा बजारें दा विस्तार करदा ऐ, रोजगार सृजित करदा ऐ ते देश दे मूल हितें दी राखी करदा ऐ।

<><><><><><>

India Energy Week

भारत उर्जा सप्ताह 2026 दा समापन अज्ज होआ। केंद्री पेट्रोलियम ते प्राकृतिक गैस मंत्री हरदीप सिंह पुरी होंरें चौथे संस्करण गी उत्साहवर्धक ते प्रभावशाली दस्सेआ। समापन समारोह च मंत्री पुरी होंरें आखेआ जे इस आयोजन च वैश्विक सीईओ दी बड़ी भागीदारी रेही ते अंतरराष्ट्री कंपनिएं बी इस च गहरी रूचि दस्सी। उर्जा, गैस ते शिपिंग क्षेत्रें च कई समझौते होए। मंत्री होंरें आखेआ जेनमें वैश्विक खडारी भारती कंपनिएं कन्नै सहयोग करने दे इच्छुक न।

<><><><><><>

Anti Terror Ops

सुरक्षाबलें अज्ज किशतवाड़ जिले दे बर्फू कन्नै ढकोए दे चतरू इलाके च चला'रदे आतंकवाद बरोधी अभियान गी तेज करी दित्ता ऐ तां जे छप्पे दे जेश-ए-मोहम्मद दे त्रऊं आतंकवादिएं दा पता लाया जाई सकै। एहतियात दे तौरा पर सिंहपुरा, चिंगम ते चतरू दे 6 किलोमीटर दी हद च मोबाइल इंटरनेट सेवां, आरजी तौरा पर मुअत्तलरेई ऐ। 18 जरवरी गी शुरू होए दे इस अभियान च भारी बर्फबारी दे बावजूद कई टाकरे होए न। इस्सै बश्कार संदिग्ध गतिविधि दी सूह लगने दे मगरा पुंछ जिले दे सुरनकोट इलाके च बक्ख तपाशी अभियान चला'रदा ऐ।

<><><><><><>

Bapu Homage

राश्ट्र अज्ज महात्मा गांधी हुंदी 78मीं पुण्यतीथि ते शहीदी दिवस पर श्रद्धांजलि अर्पित करा'रदा ऐ। नमीं दिल्ली च राजघाट स्थित गांधी समाधि पर सर्वधम्म प्रार्थना दा आयोजन कीता गेआ ऐ। राश्ट्रपति द्रौपदी मुर्मू होरें राजघाट च महात्मा गांधी होरें'गी श्रद्धांजलि भेंट कीती। उप राश्ट्रपति सी.पी राधाकृष्णन ते प्रधानमंत्री नरेंद्र मोदी होरें बी महात्मा गांधी हुंदे स्मारक पर पुशपांजलि अर्पित कीती। हर बरे 30 जनवरी गी पूरा देश महात्मा गांधी हुंदे जीवन ते विरासत गी याद करदा ऐ जेड़ा देश दे स्वतंत्रता संग्राम दे मार्गदर्शक हे।

<><><><><><>

Trump Airspace

अमरीकी राश्ट्रपति डोनल्ड ट्रम्प होरें आखेआ जे ओहू वेनेजुएला उप्पर सब्बै वाणिज्यिक ब्हाई क्षेत्र खोली देंगन ते अमरीकी नागरिक तौले गै उस देश दी यात्रा करी सकडन। ट्रम्प होरें आखेआ जे उनें अपने परिवहन सचिव शान डफे ते अमरीकी सैन्य अधिकारियें गी ब्हाई क्षेत्र खोलने लेई गैं पुट्टने दे निर्देश दित्ते न। उनें आखेआ जे अमरीकी नागरिक तौलें वेनेजुएला जाई सकंगन ते ओहू उत्थे सुरक्षित रौहंगन।

<><><><><><>